



Das lutgadoras en la categoria da dunnas.



La sceptica visavi la «Frauenswingete» è svanida. Ils umens èn spannegiads tgenina che gudogna.



Tgi di che lutgadoras n'hajan betg bellas chommas? Martina Loop e Heidi Wildhaber mussan la chautscha da carpun.



Las trais victoras da l'Urnerboden: Daniela Linggi (segund rang), Jeannette Arnold (terz rang) e la victora Eveline Fankhauser. (da sanester a dretta).

## Tge bellas chommas!

*Lutgadoras na ston betg exnum esser stagnas per turnar a chasa cun tschupè*

DA CLAUDIA CADRUVI PFEIFFER / ANR

■ En sasez spetgass'ins ad ina «Frauenswingete» bain dapli dunnas. Ma la dumengia vargada eri gist uschè blers umens ch'èn vegnids a guardar co las dunnas svizras fan da sa dumagnar. L'entira elita da las lutgadoras è sa radunada sin l'Urnerboden.



E guadagnà cun 58,25 puncts ha Eveline Fankhauser dad Eggiwil. Sia sora, Margrit Fankhauser, è daventada victura en la categoria da las mattatschas. Las duas bernaisas n'èn quest onn betg da franar. Ellas èn gia l'emna passada idas cun ils tschupels a la festa da lutgadoras sin il Flumserberg.

### Plitost ina sautunza

Tgi che crai, ch'il sport en il resgim saja be insatge per pledras e patagnras, lez sa

cugliuna. I dat tranteren ina u l'autra lutgadra che paisa bler, ma quai n'èn betg quellas che van il davos cun il tschupè. In bun exempel è la presidenta da las lutgadoras svizras. Ella sa numna Jeannette Arnold ed ha 22 onns. La dumengia passada ha ella fatg il terz rang.

La statura dad Arnold sumeglia plitost quella d'ina sautunza. La presidenta raquinta che las lutgadoras da pli baud erina anc pli grossas. «Ma uss gudognan adina pli savens las satiglias e lingieras ch'enconuschan bain la tecnica.» Ins sentia che las lutgadoras vegnian ozildi trenadas bler meglier.

En tscherts lieus dastgan las dunnas uss trenar en il medem rasgim sco ils umens. Ma quai saja plitost anc l'excezziuin. «Ins lascha cumbien in l'auter.» Uschia descriva la presidenta la relaziun tranter ils umens lutgaders e las dunnas.

### Il losch bab «Schwingerkönig»

Sin l'Urnerboden chatt'ins era Karl Meli. Trais giadas è el stà «Schwingerkō-

nig». El è losch. Betg da sia atgna prestaziun. Anzi, el è losch da sia figlia Irene Bodenmann. Era sch'ella ha quella giada gi disclertg e fatg accident. Ella haja en tut fatg ovg tschupels, raquinta Meli. Cumpareglia cun ses 124 tschupels n'è quai betg la massa. «L'Irene ha la fin finala era cumenzà pir cun 35 onns», di il bab.

Ch'ella ha gughegià pir uschè tard a lutgar è la culpa dal bab. «Jau er l'emprim in adversari da quai.» Oz ha el midà sia opiniun e ses parairi general da la «Frauenswingete» tuna sco ina laudatio: «Las dunnas na fuian betg da l'adversari. Ils umens perencunter curran savens davent. E la camaraderia tranter las dunnas era megliera che tar ils umens.» Tge vul ins dapli?

Dal reminent: La lutga sin il resgim fan las dunnas en chautschas lungas. Suentar tar la rangaziun cumparan las dunnas era en mini. Ins na vesa nagliur chommas stagnas u forsa pel d'oranscha. Quest sport fa para bellas chommas.



La victora Eveline Fankhauser dastga seser sin la spatla da las camaratas.



In admiratura en furia.

## Sco David e Goliat

Questa lutga na va probabel betg ditg. Ina pledra ed ina zaclina statan ina visavi l'autra en il rudè. Las dunnas sa piglian per las tschintas. Suentar paucas secundas sdarmaina la grossa la pitschna en l'aria. Il publicum grescha. La satiglia dat dabot ina manada anetga. Ella sa tschenta sut la grossa en il resgim. Ma sin il venter. Na sin las spatlas. Il publicum murairi. La pitschna sa ruschna vers l'ur dal rasgim. Tschella sur ella en, na vegn betg da

tegnair enavos, nundir manar ella sin las spatlas.

L'arbitr dat il camond che las duas adversarias duain star si e cumenzar danovamain. Suentar bunamain tschintg minutas ha la grossa pers sias forzas. Il publicum spetga ch'il cumbat fineschia senza victura.

Ma lura. Ina zaccudida. Ina stgarpitschada. Omaduas spatlas sfundran en il rasgim. La pitschna zaia ha guadagnà. Ses baratsch sajetta siadora. Victoria. Il publicum è ord chadaina.